

## **Odluka**

25. septembar 2003  
Javni RTV Servis (PBS)

### **I Uvod**

1. Dana 30. jula 1999. godine Visoki Predstavnik donio je Odluku o restrukturiranju Javnog radio-televizijskog sistema u BiH. Prema članu 1. ove Odluke uspostavljen je PBS, RTV FBiH i RTRS, u okviru procesa restrukturiranja. Dana 23. oktobra 2000. godine, Visoki Predstavnik donio je drugu odluku o restrukturiranju Javnog radio-televizijskog sistema BiH.

2. Dana 23. maja, 2002. godine, Visoki Predstavnik je nametnuo Zakon o osnovama javnog radio i televizijskog sistema i o Javnom radio televizijskom servisu Bosne i Hercegovine. Član 10. Zakona kaže: *«Javni emiteri su dužni poštivati pravila i propise CRA ukoliko oni nisu u suprotnosti sa ovim zakonom. Javni emiteri podliježu svim postojećim CRA sankcijama za neispunjavanje pravila i propisa izuzev oduzimanju dozvole i suspenziji.»*

### **II Činjenice**

3. Dana 13. augusta, 2003. CRA je primila zvaničan prigovor koji se odnosio informativni program "Dnevnik" TV BH1 koji je PBS emitovao, 12. augusta, 2003. CRA je PBS-u poslala pismo tražeći snimke spornog programa.

4. Traženi snimci emitovanog programa su dostavljeni.

5. U okviru informativnog programa emitovan je prilog o nasilnoj smrti gospođe Safije Mašić. U okviru priloga iz neposredne blizine je prikazano unakaženo i potpuno nago tijelo gospođe Mašić.

6. CRA je 22. augusta, 2003, uputila pismo PBS-u da odgovori na navode o mogućem kršenju Kodeksa za emitovanje radio i televizijskog programa, član 1.2. *"Pristojnost i uljudnost."*

### **III Navodi**

7. Smatra se da je PBS prekršio član 1.2 “*Pristojnost i uljudnost*”, Kodeksa za emitovanje radio i televizijskog programa.

#### **IV Odgovor**

8. U svom odgovoru PBS je naveo “...*Previd sa objavljivanjem neprimjernog inserta iz prosekture prosudili smo kao moguće kršenje naših internih uređivačkih načela a suglasan sam i sa suspekcijom Naslova da bi se moglo raditi i o povredi Kodeksa za uređivanje RTV programa, član 1.2. Pristojnost i uljudnost...*” .....”*Želim istaknuti da je upit građanina-gledatelja iz Zenice, koji se obratio Naslovu sa zahtjevom da se utvrde činjenice, u svojoj biti na mjestu i da ilustrira visoku osjetljivost naših građana na medijsko izvještavanje kada se ono kosi sa evropskim standardima u pogledu tretiranja osjetljivih vijesti o ugrožavanju ljudskih sloboda i prava, a posebice prava na život, ali i na dostojanstvo ne samo u životu već i nakon smrti.*”

#### **V Obrazloženje**

9. Član 1.2. Kodeksa za uređivanje radio i televizijskog programa “*Pristojnost i uljudnost*” glasi:

*“1.2. Radio i televizijske kuće će poštovati općenite kulturne standarde pristojnosti i uljudnosti u svom programskom sadržaju i terminima emitiranja, s posebnom pažnjom posvećenju zaštiti interesa i osjetljivosti djece. Ne smije se koristiti jezik kojim bi se moglo podsticati na izazivanje nasilja, nereda ili mržnje. Mora se izbjegavati bezrazložna upotreba jezika koji može izazvati uvredu.*

*Radio i televizijske kuće moraju imati obzira pri izboru materijala za izvještaje o posljedicama prirodnih katastrofa, nesreća ili ljudskog nasilja. Prije prezentiranja takvih scena radio i televizijske kuće moraju naći balans između želje da služe istini i želje da pokažu suosjećanje i rizika od senzacionalizma koji bi izazvao bol ili mogućnost neopravdanog ometanja privatnosti.”*

10. Smatra se da snimak nagog i unakaženog tijela gospođe Mašić nakon ubistva, pokazuje da PBS nije vodio računa da bi isti mogao izazvati šok u porodici gospođe Mašić, te da je takav snimak u datim okolnostima bio bezrazložno narušavanje privatnosti. CRA podržava novinarsku slobodu, koja takođe sa sobom nosi i određene odgovornosti. Da bi novinarska sloboda izražavanja bila u skladu sa profesionalnim standardima, ona treba da se postavi u okvire pristojnosti i uljudnosti. PBS, kao javni emiter sa posebnim obavezama u smislu programskog sadržaja, morao je spomenuto imati na umu. Sama stanica također ne poriče kršenje Kodeksa, i premda je, u okviru interne procedure, poduzela određene mjere u cilju ukazivanja na neprimjerenost priloga i

njegovog emitovanja, kao javni servis u službi građana, propustila je obavezu da informiše gledateljstvo o zauzetom stavu i preduzetim mjerama. Emitovanje ovog snimka od strane PBS-a, predstavlja kršenje člana 1.2. "*Pristojnost i uljudnost*" Kodeksa za emitovanje radio i televizijskog programa. S obzirom da se radi o prvom prekršaju ovakve prirode, trebalo bi izreći upozorenje, a stanici naglasiti da će svaki budući prekršaj slične prirode dovesti do izricanja strožije sankcije.

## **VI Zaključak**

11. Ovim se PBS-u izriče upozorenje zbog propusta da se postupi u skladu sa Kodeksom o uređivanju radio i televizijskog programa.

12. Ovim se PBS-u stavlja do znanja da će svaki slijedeći prekršaj slične prirode dovesti do izricanja strožije kazne.

## **VII Žalba**

13. Na ovu Odluku se može uložiti žalba u skladu sa članom 49 (2), Zakona o komunikacijama.

Ova Odluka je urađena na engleskom jeziku i u slučaju spornog tumačenja, engleska verzija će prevagnuti.

---

Wolfgang  
predsjedavajući

Benedek

---

Helena  
sekretar

Mandić